

2 Mi por lesa

E poema di Liki

Rinn... rin, wèker ta rin. Papi ta bula lanta. E ta bisti su slòf. Zurú di soño e ta kana bai den sala. Awe ta djabièrnè. Tur djabièrnè trùk di sushi ta pasa mainta trempañ. Ayera nochí papi a lubidá di pone e kliko pafó di kurá.

Den kashi di kushina papi ta kue un saku di sushi grandi. E ta basha tur sushi di e bakinan di sushi chikí den kas, den e saku di plèstik grandi. Riba mesa den sala papi ta mira un papel. Sin paga tinu e ta kue e papel i tir' é tambe den e saku. Kaba e ta sali bai pafó. E ta tira e saku den kliko i pon' é kantu di kaminda. Te na punta di hanchi ayá papi ta mira e trùk di sushi ta bin kaba. 'Nèt na tempu,' e ta bisa aliviá.

Papi ta dreña kas bèk. E ta bai pa dal un dushi baño. Pero e no a kaba di dreña bou di ducha ku e ta tende un gritu spantoso. Di sustu e ta laga e pida habon den su man kai. Papi ta sali papa muhá for bou di ducha, bisti su bata i kore bai wak ta kiko a pasa. Den sala e ta mira Liki bou di yoramentu. Mami ta purba konsol' é.

'Ta kiko a pasa?' papi ta puntra preokupá.

'Liki a pèrdè su poema ku el a traha henter atardí riba dje ayera,' mami ta splika. 'Awe e tin ku entreg' é na skol. Yùfrou ta bai wak ken a skibi e poema di mas nèchi. Liki a skibi e poema riba un blachi ku el a laga aki riba mesa den sala. Promé ku nos a bai drumi mi a mira e blachi ainda.'

'Kon por ta?' papi ta bisa strañá. 'Bentana no tabata habrí. Esei ke men ku e blachi no por a bula bai.'

'Si,' mami ta bisa, 'esei mi tambe a bisa.'

Papi ta pensa un ratu profundo. Di ripiente e ta dal su man na su frenta. 'Mi dushi,' e ta bisa Liki, 'ta duel mi mashá, pero ta mi falta ku bo a pèrdè e blachi ku bo poema. Awor mi ta kòrda ku awe mainta mi a tira e blachi afó ora mi tabata yena e saku di sushi. Mi no por saka e blachi mas for di kliko tampoko. Trùk di sushi a pasa kaba.' Liki su wowonan ta bira grandi di spantu. Kaba e ta kuminsá snek.

Papi no sa kiko e tin ku hasi. Pero den esei e ta haña un bon idea. 'Liki,' e ta bisa, 'bo por bisa bo poema for di kabes?' Liki ta hisa kara wak papi. Kaba e ta sakudí su kabes ku si. 'Ban,' papi ta bisa, 'nos tin tempu ainda promé ku bo bai skol. Abo ta bisa e poema i ami ta teip e riba kòmputer. Despues nos ta prent e.'

Mesora Liki ta stòp di yora. Kontentu

e ta kore tras di papi bai kòmputer. Den un ratu di ora nan ta kla. Tin asta tempu ainda pa traha un bunita pintura aserka.

Orguyoso Liki ta entregá su poema na skol. I ku tur siguransa su poema tabata un di esnan di mas bunita.



3 Bo a komprendé?

- Promé bo yùfrou òf mener ta lesa e kuenta.
- Despues abo ta les' é.
- Bo a komprendé e kuenta?

Pregunta

1. Kiko ta pasa tur djabièrnè den bario di Liki?
2. Dikon papi ta kue un saku di sushi den kashi di kushina?
3. No ta sushi so papi ta tira den e saku di plèstik. Kiko mas e ta tira aden?
4. Kiko ta pasa ora papi ta pará bou di ducha?
5. Pakiko Liki ta yora?
6. Dikon e blachi no por a bula bai?
7. Kiko papi ta kòrda ora e pensa un ratu?
8. Pakiko papi no por saka e blachi mas for di kliko?
9. Kua idea papi ta haña?
10. Kon bo por sa ku papi i Liki a kaba na tempu?
11. Kon Liki ta sinti su mes ora e entregá su poema?